

友

聲

集

燃松閣存稿卷之上

江甯顧槐三秋碧著 鴛湖王 相惜庵輯

畸人招遊莫愁湖

雙槳如飛下石頭  
披襟人想晉風流  
青山影澹白雲沒  
紅藕花涼清露浮  
江水湔殘金粉氣  
笛聲吹出海天秋  
英雄兒女終黃土  
落日蒼茫我欲愁

雨中渡江

蒲颿纔挂又收回  
江霧迷人鎖不開  
風力欲飛雙槳去  
濤聲如擁萬山來  
模糊雲樹峰全失  
零亂蒹葭岸欲頽  
我亦多情同洗馬  
茫茫相對掌中杯

十六日招同王敘庵師陳文博原張文毅齋林丈  
雪晴韓丈奕山談念堂表兄家月樵叔集燃松  
閣卽席賦呈諸丈

海內晨星落落孤諸公猶自老菰蘆半生模楷依函丈

十載飄零感餓夫無可報恩惟涕淚不堪多累是妻孥

心交更念張融否寂寞河山舊酒鑪

澹園舅氏下  
世將近十載

二姊欲歸苦留不得追憶往事悵然有作

歡聚苦日短握別紛愁歎大妻泣嗚咽小妻泣沆瀾伊  
余獨無言涕淚不可乾入春遭屯躓偃卧如蛟蟠姊聞  
急歸視寬譬從萬端旣憂病骨脆復憫家道殘粗糲爲

我飮草具爲我安藥爐手親檢湯粥咨煖寒霍然病如  
失骨肉欣團圓青春易受謝杜宇聲悲酸瀕行再三囑  
努力加飯餐哽噎不成語刀刺中心攢同居患難時始  
知離別難別離亦暫爾姊恩何時殫昔我孩抱日呱泣  
形影單劬勞母氏力督課朝夕看我哭姊亦惱我笑姊  
亦歡分燈更分飯膏沐稀容觀女紅佐饘粥戰疥膚無  
完兒時事嬉戲每戴逍遙冠鵝鴨惱鄰右橘柚毆園官  
長跪乞母憐觥撻姑從寬霜顏屢邀霽雨淚多暗彈眼  
看弟成立拔戟登騷壇于歸得快壻指日鵬風搏中道  
忽天折明鏡唬孤鸞操持困薪米典鬻空衣罄蕭條鬢

絲白一足夔蹢躅相依盼阿弟平地生羽翰誰知弟毛  
髮亦等黃門潘雞聲感醢饗草色欺袍襪求名適滋戾  
救過偏索瘢頻遭路鬼笑每被俗子謾釣鰲苦無術空  
把珊瑚竿難難活妻子瘡補心肉剜童烏復歿逝霜雪  
凋紅蘭竟辜阿姊望感激摧心肝差幸馬鬣封克舉雙  
親棺松楸樹千本負土成高巒擬耕郭外田嘯歌希考  
槃稍盡廬墓職餘事供盤桓了茲未了因逃佛羞蒲團  
詩成血盈紙不忍書齊紈

姊屬余  
書扇

風雲倏變色愁雨天

漫漫

此日最可惜詩爲蘭君作

蘭君夢先人平甫觀察課督諄諄勉以讀書作  
文旬日之間疊次入夢余因之有感書此勗之  
此日最可惜來往如奔梭來者不可恃去者亦已多君  
質既穎異君性尤安和青春易受謝白璧須磨礪君家  
光祿公青年掇巍科聲名滿

日下簪筆

金鑾坡春城桃李富鐵網珊瑚羅交遊盡公卿戚里皆  
鳴珂活人有陰陽昌後應不訛勉旃述祖德風雨勤編  
摩阿兄宦塞外迢迢眼關河書來惓惓意使我淚滂沱  
況君年力富金石皆可磨青天有桂樹待爾持斧柯已

脫紉袴習休營安樂窩毋爲學鄙人壯歲空蹉跎

蹉跎淚如雨卧疾青溪濱良朋有秦宓說士甘陳遵苔  
岑一以契雲龍遂相親醴酒爲我設茵榻爲我陳阿連  
及阿阮玉立皆嶙峋感君纏綿意忘我腹笥貧忝然遂  
北面似有香火因論文至夜半口角猶津津我才豈足  
師我志良苦辛期君學業進下筆如有神期君立修名  
孝友稱完人昔君趨庭日尋師洛城闔觥觥林夫子紛  
綸井大春文章旣淹雅品詣尤精醇君時尙童稚不解  
傳衣薪風樹一以悲海水飛紅塵炎涼逐時態飄忽憐  
青春當我授書日正君履霜辰尋師向海上不如歸求

眞思親見夢中不如書諸紳書紳無多語寸陰當自珍  
鳳皇不家食矯首翔天衢觚稜開軼蕩懷抱鬱以舒東  
裝約我去我去偏躊躇丈夫重遠志亦豈憐妻孥馬鳴  
聲蕭蕭爲君立斯須昔君出門去阿爺阿兄俱今君出  
門去金注交腐儒風波託誠信眠食憂前途蒼頭覓李  
善行李擔奚奴京華人材藪家家握蛇珠福命吾不知  
君學猶粗疎小試或中雋勉旃操大觚不行阻鵬翼行  
矣愁狼胡虜幸試期遠尙有餘工夫願君勤屬文願君  
多讀書明年捷秋風聲價重

皇都揚名泉下親追步伯也父萱堂喜健在溫溫奉花



輿門生曳金紫我亦光門閭詩成再三囑此日君何如

悼蜨詩三十首

錄十八

余自姬人亡後意忽忽不樂抑情割愛終不自  
釋適友人楊樂山出咏蜨詩見示中有句云不  
堪夢裏逢三月也算花間過一生余讀之潛然  
淚下因綜姬平生賦悼蜨三十首聊當寫照篇  
中撫今感昔傷離惜逝如羅浮兩山風雨離合  
是人是物不知情之一往而深也姬而有知能  
無珊珊來栩栩活耶

老去看花眼易紅風流迴首憶牆東生當紫燕黃鸝後

春在濃香淺夢中  
豔福已拚今世盡  
芳心肯逐曉雲空  
尋常一樣綃裙化  
飛傍妝臺便不同

家在羅浮縹緲峰  
無端小謫滯仙蹤  
父蛾母蛹都難問  
鳳泊鸞飄已自慵  
絕豔易迷金翡翠  
靚妝偷學玉夫容  
閨中女伴知憐惜  
簾幙春寒護幾重

又值南園草綠時  
東風吹輭玉腰支  
春如醇酒心先醉  
花隔重簾夢已知  
楊柳本爲消恨物  
海棠都是定情詩  
書生輕薄終須恕  
一半顛狂一半癡

金屋妝成錦繡圍  
紛紛紅紫鬪芳菲  
纖腰自按花奴鼓  
綃袂新翻玉女衣  
拚被鶯捎逢薄怒  
卻防蛛網礙低飛

風光大好心仍怯隨著銜泥燕子歸

遊仙一枕樂蘧蘧香霧朦朧襲滿裾紅蹴圓渦酣睡後  
黃安嬌額午晴初兜來團扇風微顫簇罷羅裙態轉舒  
絕愛玉鴉相對撲湘簾不捲致蕭疎

零落籬門菜一畦多情忘却路高低新絲鎮日縈蠶繭  
香氣私教避麝臍苦抱空枝忙刺促強偎斜景恨淒迷  
癡心不怕東風惱怪底流鶯作意啼

不解傷心不美人對花歡喜背花嗔繁華易醒千年夢  
生死都爭片刻春妙舞曲傳風態度多愁越顯玉精神  
蘭因絮果分明在杜宇聲聲勸最真

南浦銷魂草又薰蒲帆高挂大江雲梅花帳冷空辜我  
杏子衫輕合贈君此日分飛憐弱翅他年薄命有孤墳  
青陵臺上朝朝望落葉哀蟬忍更聞

紅潮酣頰孕眉山燕乳鶯雛總一般墮地香名誇鳳子  
驕人錦襖燦花斑應教金粟前身認不枉珠胎昨夜還  
旁挺側生都莫問春風堆擁上鴉鬟

弱不禁風強自飄天涯消息斷蘭椒孤花一樹春無主  
清露三升酒代澆簾外輕煙霏綠蠟窗前微雨溼紅蕉  
腰支瘦盡渾閒事擬托鱗鴻寄錦綃

果然芳訊墮花梢半幅羅巾眼淚包人似春駒忙不駐

路隨歸燕巧爭抄情知陌上紅香賤忍把風前白打拋  
去日天桃今在否柴扉不敢便推敲

珊珊仙骨奈卿何扶病看花眼一睽春到曉鵲紅雨盡  
夢回芳草綠陰多人間何物容脂粉天上從來賤綺羅  
已分乘風歸羽化多情還擬救飛蛾

驀地雌風喚鬼車中庭一白綉毬花仙山有路偷靈藥  
香國飛身豔落霞金箔朱泥癡客夢玉膏紅蜜美人家  
劇憐雙宿雙飛影從此春光斷茜紗

兜綿雲輦緒風輕紅煞夫容想玉京天上果然歸舞隊  
人間何處覓飛卿餘花賸草空三月斷雨零煙了一生

千樹棠梨澆麥飯可憐鳩婦喚清明

春風又到綠莎廳儘有癡人喚不醒一夢甜鄉通漆黑  
千年幻影照丹青悵悵雨暗紅蠶閣黯黯塵封白鳳翎  
留取滕王新畫稿驚鴻幾度覓娉婷

絕迹飛行我尙能可堪追逐憶良朋收香畢竟留么鳳  
鼓翅終須讓大鵬短夢輕塵都了了虛空粉碎一層層  
無端又被莊周誤祇隔羅幃叫不應

潑水春寒凍不流忍教鄉再築溫柔遊仙已判成園客  
得埽眞應號粉侯鸚鵡尙呼金屈戌蜻蜓空顫玉搔頭  
拈花鬪草都無賴紅是相思綠是愁

傷病傷春口自緘風前豔想一齊芟生非石燕能無恨  
死住蓉城定不凡香土再搏終隔世仙風可御欲張帆  
詩成謝逸真腸斷合遣司花署蜨銜

贈徐兩田兼寄王大慈雨

名紙驚看喜復愁故人家在海西頭書來問我米鹽况  
別後幾經花月秋帶一分才增抑塞寄雙行淚說漂流  
憐君同作諸侯客如此天寒尚遠遊

白門霜柳下棲鳥泥飲空遲舊酒徒閱世自憐雙眼在  
論文真覺寸心孤思君顏色看明月寄我詩篇抵貫珠  
聞道茂先能說士娜嬛還許借書無

大水嘆用正輪韻

雄雷忽跳邊雨泣山精唬騰蛟扇威虐瘡痍遍蒼黎排  
山更倒海乾坤悶端倪怒極駭翻地力猛思潰隄江水  
勢洶湧霖雨聲酸懷所至陷窪穽彌望皆塗泥居人苦  
奔竄版籍無由稽浮屍蔽江下膏血肥野藜存者益憔悴  
腫脆如玻璃頰垣日傾壓往往排牆擠盪舟出高冢  
沒髀驚流澌嗟哉竈觚上蛙蛤紛與齊避水若避賊謹  
譟聞鼓鑼登高一爲望九達無餘蹊鳴雞上高樹咫尺  
迷東西作書告河伯毀壁刑牲題汝職忝望祭廟食神  
所棲東南力凋敝面色餘枯黯奈何縱龍屬俾我民卒



迷天心自仁愛寓日增憫懷常平詎可恃奸吏吞渴貌  
市糴孰平反米色攪霉低疇能策荒政當塗多蔽詆安  
得射蛟手盡殺剽水犀鎮以大郡鐵無俾滋鯢鯢望氣  
坎雪嶠保生治復畦矧今

大聖人水旱勤嗟咨蠲卹

詔屢下貪墨諄提撕慎勿爲攫肉乃至麀扶臍飛章達  
我

后此意天所俟

喜雨

一雨鵲聲喜東郊方閔農飛霽及雪澤破凍春泥鬆溝

陸漸通水薺麥回春容豈惟蜚螭死亦免蔬果凶侵晨  
勃姑叫壓檻癡雲濃山居日無事卧聽虛枕春故人冒  
雨至筍屐留沾蹤爲言米價善賈舶來重重無田我亦  
喜鑪糲猶可供轉念寒食近墓祭經秋冬無因奠漿酒  
涕淚霑青松晴爍翦兒輩拍手驅泥龍

哭張子瀾

一慟生才意埋憂又到君無棺填磊塊有氣鬱風雲弱  
息知誰護遺書幾輩分

病中以書  
分贈友人

九原應不瞑垂死訂

斯文

咤叱千人廢槎枒一座驚酒狂先指屈詩伯并心傾忤

俗難爲偶灰身不讓名低徊鸚鵡賦終竟累聰明

感憤成奇疾憂生發浩歌知交如雨散詛咒患才多鬼

如彌駭激天刑教折磨

君以終身叩紫霞妙德真人到云行逢羊虎之年必有奇禍天

刑之乃所以全之也君何憾焉平心觀著作餘子竟如何

晚歲論交日青溪水上樓君才真十倍此敘足千秋

君敘

然松閣賦鈔

孤憤生無賴奇窮死亦愁空山驚噩夢

先數夕夢君手

持冥錢顏色慘沮俄得凶耗

相望涕橫流

### 始信峯

說來渾不信到此亦因緣陡絕疑無地虛空但有天紫芝生石罅青筍落松巔便欲乘風去清都訪列仙

危橋通仄徑竟渡卽仙人怪石垂癭瘤森崖嘯鬼神青  
迷煙九點紅隱日孤輪身世憐稊粟觀空定海塵舊有定空  
室今廢

遙山分郡縣螺縛隱青紅飛鳥望疑沒一峯孤愈雄人  
家黃海外雞犬白雲中坐久渾忘返高寒起烈風

松濤喧萬壑寫韻入瑤琴流水百年意道人孤坐心煙  
霞能讀曲猿鳥并知音便擬西臺哭忠魂旦夕歆明翰林江

天一嘗游此麗田其族子也天一與金海陽同殉節

### 師林題壁

師林開勝境十里便聞鐘僧老有奇態山遙無定容晚

煙蘿壁翠寒色蘚花濃  
今夜聯牀夢孤雲又幾重  
布衾涼似水轉藉白雲溫  
木魅閒窺客山魃夜打門  
死灰然芋火孤壁走詩魂  
俯仰慚身世吾生蝨處禪

詠懷用阮嗣宗韻

牙期邈曠世誰當理清琴  
收拾薦古錦零淚沾衣衿  
芳草坐銷歇荆棘森成林  
臨風發微歎惻惻傷中心  
名都彼淑女窈窕淩波翔  
體嫺靜婉婉璆珮鳴芬芳  
贈我合歡綺信誓要無忘  
薰香置懷裏斷絕摧衷腸  
清商變素髮絡緯曉空房  
雝雝鳳皇鳴零露晞朝陽  
富貴永相保貧賤徒離傷

條風轉淑氣朱英豔桃李花實兩不堅搖落自今始後  
凋愧松柏散漫逐荆杞大化無終窮圓顱遠方趾生無  
不朽名冥滅亦云已

浮聲汎瑤瑟清歌激迷陽鬱鬱元雲陰曖曖白日光一  
彈弭素節落葉森微霜玉妃顧之笑幽蘭吐其芳泠泠  
天風吹飄飄素衣裳馳情結雲表豈戀咫尺翔生存兩  
契闊永沒無相忘

穆滿觴瑤池西極萬里道黃竹一以歌茗顏詎長保我  
有同心人天台拾瑤草一別經十秋相思令人老常恐  
成衰遲君來及姣好

淮南叢桂樹偃蹇生岩阿無人慕窈窕山鬼微吟過不  
愁令節晚心惜秋風多少年事結客馳譽傾三河壯歲  
去奄忽攬鏡空咨嗟

疾風捲枯籜涼雨生暝幃旣感時節變復爲蒲柳悲大  
塊鼓噫氣搖落當語誰金英耀秋鞠幽姿弄寒暉挺霜  
固其性歲晚從之歸

朝上黃金臺撫劒動悲歌壯士去不返酒徒時復過思  
頓羲和轡白日空蹉跎寒風起蕭瑟極目惟長河暴秦  
翦六國寃覺積已多荆卿偉志節賁恨當如何

元化甄大鈞包含廓無外萬古同一塵山河此襟帶偉

茲命世人龍躍與時會彌縫澆俗淳揮斥濁流害向無  
詩書澤悠悠獨何賴

蒼梧一騁望遙睇荆山岑欲齎素女瑟一鼓青楓林二  
女不見答淋浪溼衣襟浮雲結楚甸萬里生重陰冥冥  
深夜雨烈烈哀猿音泣盡鳳皇血焉知斑竹心

越溪采素葛吳綿織織衣幸得薦君體薌澤相因依但  
賞素質豔豈念絀女飢手爪妄自惜棄置君所悲因風  
化采雲宛轉相從飛中道犯霜露脆薄將焉歸

爰居避風至焉識鐘鼓音憂愁瞪目視羽降隨漂沈小  
智荷殊寵酣身恣荒淫凶害灑然至糟邱築成林安得



曠懷士一騁青冥心

志士惜晷短躡影過鄧林魯陽竟迴照悲谷馳駸駸風  
霜抗高節天地明孤心時危悟忠款執手空涕滂安樂  
轉棄置患難豈復尋眷言始終意太息誰能禁

子雲不曉事寂寞空著書元文竟何有悠悠千載期五  
侯競門第榮華使人思朝乘朱轂貴夕上邛山時賢愚  
諒同盡皇皇欲何之三復井眉贊不飲空自嗤

長卿旣倦游冠蓋辭大梁彈琴遇文君輸心達微茫匏  
瓜感無匹中夜相翱翔驅車臨邛市四壁徒相望青山  
蹙眉黛紫裘凋蕭霜不有慕才主彼美心徒傷王孫大

駟耳交驪固其常如何白頭歎辛苦著篇章

六鰲屹海柱莫挽山岳傾  
瞳瞳搏桑日向夕歎已冥  
瀉水不思器漂英徑辭榮  
今豈昔所頓後豈今所生  
有生譬朝露弱草棲熒熒  
造物巧搏控親屬斯合并  
恩愛尙難保况乃名宦情

太阿秉龍德灑灑寒泉光  
瑩以金鵬鵠飾以雙玉璫  
願言奉君子佩服傳芬芳  
威名振絕域晞髮鍾山陽  
恩讎快一決矯若神龍翔  
君言刃已頓寸斷置我傍  
人微物自賤何用相悲傷

采桑滿籬箔桑盡蠶吐絲  
團成合歡繭及爾燕婉期  
綢

繆理密緻雙臂繫綴之豈意兩連愛中道相訣辭桑以  
直見伐絲以柔見欺感君昔同澤泣涕終保持

魯連黃鵠子一舉縱青冥談笑卻西帝拂衣事長征英  
辭沮金石薄海傳義聲神龍不見尾下視蒼蠅鳴悲哉  
其住客降虜歸秦庭

束髮冠鷄鵠勇爵厠羽林交驩黃金賤噓氣白日沈清  
歌激浩唱簫管競繁音金吾但陰喝趙李復追尋不遇  
報讎子焉識朱家心

至人御六合感精降陰陽一出拯世難再舉恢天綱功  
成被金石雅樂歌帷房冠裳耀春日賞罰明秋霜君臣

眷同德千載相輝光嗟彼蓬萊子咫尺焉得翔

同生各志趣有鳥棲桓山不念黃口時接食飛翩翩乖  
離母心痛中夜聲淒然求曹誤如偶鵲鳥誇嬋娟慎勿  
信鵲鳥骨肉痛相連

楚王罷畋獵夜宴章華臺酒酣睨周鼎顧盼何雄哉金  
輿夜半出玉座生蒿萊當時同輦人稱壽豈復來滔滔  
江漢水洪波蕩飛埃豈悟侯王貴下同塵與灰

燭龍耀九地不照漆室幽女夷鼓萬竅不改金行秋降  
衷有三命身世良悠悠若可智力競江水迴東流達人  
事委順仰視輕雲浮有身乃太患無爲久羈留閔生決

癰瘤觀化同嬉遊  
凌晨鼓枻去漂飄  
汎虛舟

魚鳥忘江湖蛟龍泳湍瀨  
時際理不違性慙形乃外  
古有榮啟期行歌挈索帶  
遠念世上人衣食各有賴  
胡爲巧偷奪擾擾遘凶害  
不念止足言憂患方此大

玉馱趣飛駕流覽周八荒  
騁志亦有極故鄉安可忘  
庭前朱華樹照爛白日光  
芳時逐衰謝感此意氣揚  
志士念邱壑勇士思疆場  
生存志節顯已沒榮名彰  
此願苟不副哀樂將反常

神仙亦何樂孤抱鬱不舒  
脫屣去親愛汎若波中鳧  
林深虎豹慄服食固有虞  
迢迢易遷宮升降事涉虛  
一爲

鬼狐蠱永與人世殊空山氣淒愴歲晚誰與娛燒丹亦已誤况乃司錄符不如飲美酒行樂休躊躇

生爲丈夫子顧盼豈不雄章縫被服姣禮樂聲施隆尙友托千載淑問昭有融誰令跼蹐行約已忘謙沖日言市虛譽昏夜莽伏戎邱山積咎釁學賤身豈崇冒恥觸世網焉能保其終歌詩感城闕悠悠跂宗風

黃鵠奮六翮下集昆明池迴翔啄鯨鯉進退得所宜遠憐鷺鳩輩挾起枋榆枝大小各有定沒身寄藩籬去去謝羣鳥慎勿相追隨

流螢照墟墓清霜被蒿萊念彼泉下人言笑安可陪生

燃松閣存稿

卷之上

五

前不作達一冥良悠哉

賈胡一何愚剖腹藏明珠風波涉危險去去遠室廬歸  
來託鄰里炫服鳴輕輿豈如耦耕樂桑柘生路隅自非  
早滯歲沒身無歎歎衣食取纔足俯仰亦自舒

燃松閣存稿卷之上終

燃松閣存稿卷之中

江甯顧槐三秋碧著 鴛湖王 相惜庵輯

題溫伊初孝廉吾山全集

文章筦氣運今古相推更自初有作者命世才從橫所  
學皆實驗庶物資權衡不朽并功德是爲不虛生出處  
雖異趣千載揚駿名邇來頗衰茶俗學紛并阮舉世逐  
荒蕨川谷爲壟盲生才不逮古誰與掣長鯨豈無嗜古  
士篤守先民程窮鄉謝講誦孤學來鬩爭燕石寶緹襲  
康瓠夸疊疊白首握丹槩學藝終無成溫子蹶然起復  
古心怛怛讀書恥章句抗志希前英力掃俗窠臼獨奮



驚人鳴闥揚必忠孝根柢歸性情威鳳一以叫百鳥不  
敢聲秋嶽聳精峭疾雷走鏗訇萬壑洞呀豁弧線仍孤  
平充其力所至太阿失專精餘事乃治詩足使韓杜并  
平原氣淒愴廣樂聲明清陋儒苦舌撝轉復相詬輕高  
心眇流俗侂得非所營訪才遇文海鐵網羅春卿一名  
豈居重萬目徒驚瞠窮秋聚海上握手雙心傾願慙學  
荒落廿載空研京對君恍然失惜此春茗榮思乞士安  
敘一謝時世評爲予敘然松閣續藁懽宴苦日短飛蓬事孤征行  
將返故山誅茅學躬耕願君出所學高步天衢亨膏澤  
丐萬物

皇路歌由庚論事先膽識服官矢廉貞謝安才槃槃子  
橫氣觥觥晉詩當左券用以將吾誠

遊黃山道中書所見

山雨一夜晴溪流百泉活矯如鷹脫鞢疾如箭離筈琴  
箏咽幽潺雷霆鬧轟聒中流忽踰躋醜石故相殺水怒  
不讓石洶湧萬山拔猛墮鋒疑摧餘勇怒猶戛導以雨  
白龍驚濤濺飛沫游鱗靜可數苔瘦綠如髮洗眼看青  
山雙眸一爲豁

青山撲面來拱揖互相讓連岡旣遙裔複嶺尤跌宕中  
間起一峯卓立表孤抗環山并松竹蒼翠不可狀徑絕

心已通峰迴日逾曠惜哉稍由少山力太憊壯安得夸  
夷子鞭石驅疊嶂萬頃成膏腴千艘轉漕饒山石如點  
頭微吟答樵唱

高秋厲爽氣萬木淒以黃商飆吹葉落蓬蘽從之揚棲  
雅坐相救戀此牛背光疏籬紫豆莢汀洲白蘋香采采  
夫容花幽溪媚紅芳

野田中見木  
夫容一株

以彼柔脆姿詎能耐

清霜後凋有松栢冬心抱青蒼生理盛必盡毋爲怨凋  
傷

### 老人峯

衆生苦濁歲老人獨觀空自初有天地拄杖無始終若

非磨鏡叟卽是種桶翁髮被仙草綠顏駐朝霞紅有時  
誤伸腳踏破青濛濛興亡閱僧臘心孤體自崇會須騎  
白鵲與汝棲樊桐

眉毛峯

佛說具善相珠眉爛銀光震旦蠟毛孔鞭心入豪芒茲  
峯乃具體疏翠森成行纖蛾掃石黛攬鏡難爲妝山鬼  
笑含睇要眇時相望松毛閃天艮覆此晚晚睂世無張  
京兆雙彎爲誰長

仙掌峯

五峯禿如指高蹠遺仙蹤朝天有佳俠捧出青芙蓉三

霄墜沆瀣冷逼金莖濃側看比合十膜拜何雍容誰將  
兜羅綿塞此卅字曾有時拍掌笑萬壑酣笙鐘指禪竟  
誰豎根鈍慚天龍

清涼臺

看山不厭高一步峯一變孤臺峙清涼萬壑俯葱蒨初  
日騰朝光草露溼猶泣丹林一夜霜華藻媚春絢山好  
如貢奇橫側總當面窈窕呈身容刻削露趺趺遠觀覺  
疎宕少進轉研鍊賞偏愛難割目涉美疑眩坐久來清  
風冷雲攫喉嚙采采金蓮花卽此五臺現

天風吹客衣欲與雲俱飛雲飛固無心蕩漾澄清暉偶

懸挂巖際山骨爲之肥空綠不成雨孤煙散霏霏山意  
如入定客心亦忘機萬竅返虛聽水流花欲稀安得抱  
琴叟清聲發雷威心空味無極超然謝塵機

白天門限至一線天得詩四首

山花不知名紅紫錯薪楚風來遞幽香鼻觀破初祖美  
草藉芳茵文禽相對語心空萬慮清山靜似太古坐久  
衣袂寒空翠落如雨

青猿聯臂下各各緣松枝倒垂示閒暇塞鼻相娛嬉山  
果釀成酒亦知媚其雌道書頗能讀劒術將安施陰陽  
互亭毒一物終無私

沈沈鐵牡關絕壁表廉悍鬼物騰青紅萬古變昏旦一  
竅通微明激射日光亂虛室生吉祥理活氣乃貫燭龍  
照九幽斯言儻河漢

陰崖積冰雪傳自羲皇年日光照不到空水相澄鮮旁  
有枯松枝然之亦無煙萬物互蒸變陰伏陽乃愆安得  
起姑射服食成水仙

孤桐曲爲節母陳孺人作

孤生之桐幹如鐵何年鑄此奇骨節風吹海水凍欲裂  
一夜華開白如雪青鸞蝕鏡鏡影缺生誓同夢死同穴  
同穴心所安孤雛粥粥憑誰看從此涕淚不敢彈欲殉

大義爲其難青燈永夜高樓坐兒讀遺書母操作兒衣  
鮮明母裳破兒飽饒糜母飢餓破格提攜恐疾病忍心  
觥撻防嬌情月落未落烏唬霜剪刀聲斷天蒼涼阿爺  
衣帶猶在箱爲兒裁翦成衣裳春風蕩蕩吹衣香兒身  
漸比孃身長會看黃鵠翔千里好博紅綾字幾行誰知  
天意眞冤酷白頭人撫金環哭無藥能瘳枉拜醫餘生  
欲代空祈佛上指三天下九泉輕塵短夢散如煙彌留  
手握彈成血慘絕魂招語不全麥飯淒涼新繡帳苔牀  
包裹舊衣棉人生到此眞難問海枯石爛留長恨開到  
孤花雨露偏燒殘劫火精靈困我亦春暉未報恩東風



寒食感雞豚詩成莫作尋常看字字淋漓血淚痕

書陶宏景傳後

神仙樂宰相苦衣白山人與君伍一霎朝冠挂神武勾  
漏沙同茯苓煮日聽松風看松雨華陽洞天白垂乳九  
轉丹成變龍虎腦骨逢逢響天鼓笑把竹枝如意舞昭  
陽殿作單于宮始識神仙有千古

風雨連日齋中默坐有懷周笛君趙倬人馬春泉  
諸子因憶前月望日蘭君招三君集青鳳齋醺  
飲彌日是日亦大風雨衝泥而歸別來已匝月  
矣詩以代柬

空堂積水渾欲浮欲雨不雨聲颼颼忽如萬馬騰浴沸  
天風捲作沙場秋頽雲片片墮簷瓦從以落葉紛鏃鏃  
芭蕉力大作撐拒勢如鏖戰不可休須臾涼氣逼襟裊  
冰絲倒挂銀河流微明溼處閃鴉背萬綠洗出低竹頭  
風驅疾雲如掃籜雲挾猛雨如奔牛是風是雨不可辨  
但見煙光漠漠生簾鉤連朝天漏慳放曉石髮慘淡青  
苔幽蝦蟆吹水瞪雙目蜺蜺篆壁蟠腥蚪閉門鹿鹿但  
枯坐美人不見中心愁燈紅酒綠記昨夢相思彌月安  
能寥二君才調古無偶搖筆便可凌滄洲奈何傭書寄  
廡下使我結轡生煩憂移居喜值通德第平泉水石供

遊遊千章老樹增鬱怒陰廊窈窕迴松楸野狐跳躑老  
鵝笑風噪雨嘯聲啾啾此時詩境定清絕一龕燈火相  
唱酬松枝煮茗爨煙溼清談更憶鯁生不人生行樂貴  
適意安能閉置同拘囚何時同泛虎邱櫂何時共載山  
陰舟醇醪正量懷周侯鳶肩事業思馬周還將風雨高  
齋意爲寄詩人趙倚樓

長歌寄孫顯甫

黃雞喔喔鳴枯桑海水凍合天蒼涼美人不見怨瑤瑟  
烏嘯月落歌繁霜君家門第舊通德起家秘省中書郎  
杜陵履廣遮寒土白傅裘溫被洛陽至今都人述遺愛

往往涕淚沾衣裳君家大人肯堂構榜花早占秋風香  
扶搖戢羽便歸卧手栽松竹皆成行日澆紅友醉花國  
倦搗黃嬾遊書倉冰清況有秦學士青鞵竹杖看山忙  
君才軼蕩更清絕碧梧小鳳鳴高岡憶初逢君正文戰  
搖筆便已紛琳瑯韶光彈指過十載感我鬢髮成老蒼  
嗜癖有癖獨阿好謂我癡絕同長康去年南城購書舍  
欲與估客爭糴匡秕糠眯目市喧雜君獨宴坐無所妨  
精心暗察鼠雀耗新詩妙發瑜瑾光爾時文園病消渴  
閉門避暑如燂湯珍珠密字屢寄意忽然起疾箴膏肓  
朱提十笏納我裏桃花米熟擔盈筐瓊瑤欲報力綿脆

祝君咫尺翔天閭冬烘頭腦竟報罷歸來清淚盈眦眶  
青春獻歲梅破藥勞君置酒登君堂談諧正謔靡不有  
沉醉何止三百觴更尋虎穴探虎子山僧忙煞詩人狂  
竊來珠履貽新婦添上薰籠坐洞房果然熊羆兆佳夢  
投懷玉燕看弄璋書來喜字三十六嘯聲想見超尋常  
願君努力述祖德竿頭進步無相羊立品須如鑄渾鐵  
積學未許擎空囊山高放步莫嫌遠海深有權終能航  
古來男兒重血性聖賢仙佛安可量雲龍蒸變澤萬物  
否亦名世傳文章科名祇爲顯親具失不足恫得豈備  
但教出處號醇士流風沾溉餘一鄉况君年富力強壯

橫磨十萬誰能當多君淳慤得古意惜君拘泥難通方  
雙丸迅擲當自愛慎勿老大徒悲傷嗟余三十不稱意  
年年刺促摧中腸命宮磨蝕古所歎可憐百鍊無全剛  
敬通稚子在襁褓左家嬌女方扶牀大妻愁顏泣明鏡  
小妻高髻號紅妝誓攜書劍出門去飄然騎麟遊大荒  
欲留苦無饘粥計欲行苦無輕車裝丈夫有淚不輕灑  
名士無家何所望張堪自可妻子託衛玠業已形神亡  
金臺聚首問何日前塗良會眞茫茫感君與我意良厚  
爲君一曲歌清商人生知己那能再嗚呼此曲君無忘

和高陳又蘇詠影

分身擬上碧紗籠  
鏡殿風情晃漾中  
過眼妍媸都莫問  
自家長短尙難同  
孤鐙委照應憐瘦  
一笑迴頭轉覺空  
絕愛陰肩高聳處  
形神消釋悟陶公

曉赴新河招同俞子木龔生謙夫葉生兩窗憩三  
山二水之居讀壁間諸君詩因憶亡友張子淵  
悵然久之賦詩寄呈竹嶼觀察

高臺醺酒記青蓮  
香火仍留曠代緣

竹嶼取太白詩意於佑聖祠後拓屋

三楹奉太白象  
檻外江聲終鬱怒  
尊前者宿卽神仙

落成

別構亭曰鷺水  
日相同張古餘  
太守孫尹圃刺  
史方茶山觀察  
談念朝

堂表兄朱嶽雲鍊師賦詩以紀之竹嶼撰記勒石

霞鳥背千帆  
雨落日魚鱗  
萬井煙比似  
莫愁催艇子  
可

無荷葉綠田田

蕉雪圖成有作家不披宮錦亦清華  
蟬聲過雨亭三角鷗夢分涼水一涯  
身後才名原畫餅閑中宦味似搏沙  
相逢那怪頭俱白蘆荻蕭蕭也作花

過眼雲煙壁上詩鄒枚才調各分馳  
翻憐張祐埋憂日

不及夷門大會時生是有情皆落魄  
地當選勝倍相思

茂陵遺藁分明在還乞風人作主持

子瀾病革時竹嶼贈朱提十餅今遺

藁予代爲選次不能無望於竹嶼也

題周竹恬芥圃詩鈔

周郎詩格清於水脫手彈丸無不美  
清俊時登庾鮑堂



高奇擬薄曹劉壘我更獻君芻蕘愚願君還讀千卷書  
上之瑚璉珍國器次亦淹疋成通儒剛日讀經柔讀史  
開卷有益良不誣試觀古人著書者穿穴各有真工夫  
造物愛名不輕錫會須全力相委輸西山丁穴恣漁獵  
曹倉鄴架供馳驅龍湫湧地噴百斛珠光照市傾五都  
譬如仙人養丹藥烹鍊須向陰陽鑑傾筐倒篋靡不有  
馭風叱霆皆自如可知一字不著處雲漿化液蒸醍醐  
否則體弱文不稱伯仁有腹徒空疎風雲月露豔雕刻  
圖成沒骨安貴乎聞君型家頗孝友天倫歡樂怡慈母  
卽此能過鐘鼎榮莫教徒恃風華首况君未及相如貧

喜無齷齪淹頭巾一瓚可叩子雲戶千軸當貯曹氏困  
嗟余卻受讀書累青衫潦倒心如醉汲古空教說線裝  
爭光未肯偕魑魅請君更東交遊牒休作雲中驚蛺蝶  
交雜都堪累性情人多那盡稱豪傑好向娜嬛讀異書  
他年同訂名山業

方景二忠祠

策嶺景公西方公先死後死同一忠麻衣上殿雪光白  
緋衣上殿星光紅先生望重書種子秀才名隸文昌宮  
有舌可斷血可喫死猶爲厲真鬼雄魂歸應逐火燒去  
皮場一炬騰青虹株連十族逮瓜蔓成仁取義從同同

魏魏祠宇光日月文皇功業隨秋風生兒高照況無賴  
頃刻燒死銅缸中

東園步月同樂山作

城頭烏鵲鳴喳喳欲落不落煙光斜明蟾墮地寫空水  
千林倒浸分丫又清輝娛人照毛髮時有香氣吹林花  
池塘綠淨不可唾吹聲聒耳喧鳴蛙跳波更喜魚潑刺  
爛銀一色鋪蘆芽居人閉戶正酣睡但見瓦屋分凸窪  
荒荒頓覺襟抱遠別有清妙無喧譁微風忽定煙柳直  
花影自動籬門遮憶昨與君別三載面塵足繭行天涯  
他鄉無此好風月蹉跎已自傷鬢華及時行樂須我輩

慎勿貧賤生咨嗟南城花事正婉孌明日約君過酒家

怨歌行九章

錄六

吳趨且勿歌巴歛且勿喧請君罷歡宴賤子歌一言人  
生百歲匆匆死憂患先從識字始青銅璀璨日月光焉  
用區區管城子滄海悠悠識者誰灼肺煎心竟何似飢  
鳳甯食烏鳶餐斷琴甯對犧牛彈飛鴻冥冥志寥廓乃  
爲稻粱漸陸磐舉足不慎蹈羅網天昏地黑行路難行  
路難一杯酒槁死風塵勝株守丈夫肯戀兒女私拔劍  
出門不回首

世路等棋局險巇多不平勝算各相握對面生殺心瞿

塘澹瀕大如馬估客停舟不敢下太行峻坂堅冰疑游  
子拄杖不敢登人心奇險差足擬赤地無風捲波起讀  
書不解通世情照人惟恃金眼睛尊前然諾一杯酒甘  
言蜜語同膠餒耳餘結交號刎頸一朝賣友生危傾事  
成不與其榮利事敗乃獨歸惡名儒冠著溺不可戴西  
江之水難澄清

美人旣醉朱顏酡舉觴宴客金叵羅明眸皓齒揚清歌  
銅盤照夜燒冰荷花光搖搖紅欲波嫣然一笑低雙蛾  
中天明月今宵多玉繩耿耿明秋河蘭房清闕簫聲和  
宓妃授枕留東阿壯心骯髒聊消磨流光迅疾如跳梭

修名不立當奈何

讀書不救妻孥苦挾貲去作洛陽賈大妻把盞小妻舞  
翩翩裘馬客趨風金谷豪華安足數壁中窮鬼笑不休  
迂儒那解精持籌人生貧病猶可瘳惟俗乃無醫藥投  
君不見長安道上多貴游一朝零落歸山邱黃金不救  
枯骨醜青衣裹束空慚羞無端奇想召天禍咄哉執鞭  
不可求

憶昨結客金臺上長轂高軒氣何壯西山秋色落杯中  
日射天門開詆蕩金吾斜睨不敢呵旗亭笑賭雙鬟唱  
輕裘更作東魯游一輪紅日岱峯頭看花屢和南池句

把酒重登白雪樓  
梁園花事仍相待  
大隱夷門復誰在  
黃河驚浪駕崩山  
紅鯉雙雙鱸玉盤  
醉吐不辭賓席淹  
詩成都借美人看  
長年漂泊人歸卧  
老屋燈昏棲馬磨  
把袂誰憐范叔寒  
乞漿那惜王孫餓  
安得走馬盡交當  
世之英豪興酣解  
贈千金刀屠門沽  
酒飲我曹一聲長  
嘯青天高

船紋斑駁瘦蛟醜  
冰花洗出空空手  
霜淬芙蓉海氣秋  
七星耿耿冲牛斗  
道逢俠客不可留  
絳衣帕首鬚如虬  
旁觀偶說不平事  
風馳電掣神鬼愁  
歸來笑擲仇人頭  
酒酣爲我拔劍舞  
冷氣襲人退丈五  
空中起落雨白龍

謾謾虛堂動風雨我亦嶽崎羈落人年來彈鋏走風塵  
噫嘻乎安得隱娘作婦昆侖僕償盡恩讎願已足

感遇

美人捧鏡忽然泣照見如花好顏色不因恩禮冠當時  
那得秋風長棄擲絕艷由來見嫉深妝成一笑值千金  
傳紅寫翠辜描畫轉綠迴黃空好音此時鏡光黑如漆  
區區不照丹誠心君心妾眼中淚自向鏡前磨鏡背  
聞風仙人顏色姝玉冠金簡天門趨風吹海水湛深綠  
種來桃實皆紫腴桃花紅入江南北咫尺仙雲如不隔  
別有眞靈位業人玉龍騎斷無消息手折桃花贈一枝



玉璫緘札轉遲疑。罡風吹墮平常事。還憶仙宮種樹時。  
鍾山之英草堂靈兄弟。願我皆眼青韓陵片石。誰其語  
並世。卻已同溫那元。方才望我所師。儀毫學步終嫌遲。  
祇今蹉跎並頭白。那能老作諸侯客。羊公舞鶴葉公龍。  
眼底紛紛皆耳食。東鄰寒女傷心人。十年不字羞呈身。  
飛鴻冥冥弋何慕。白鷗浩蕩誰能馴。

燃松閣存稿卷之中終

燃松閣存稿卷之下

江甯顧槐三秋碧著 鴛湖王 相惜庵輯

踏災行

漏天匝月雨不止鋤柄生霉老秧死圩田十室九報災  
曉起掌船入城市朝不見長官忍饑匍匐公堂夕不  
見長官風刀刺骨寒無裳借問長官在何處搖手禁聲  
吏胥怒長官昨日禍城隍爲民請命宵焚香官厨昨夜  
斷屠宰願災不成漕不改道逢長官吆喝來攀轅泥首  
心悲哀今年秋成擬大熟誰料蒼生苦無福田廬漂沒  
居人空耕牛已賣餘哀鴻阿爺夜半護圩去可憐身葬

淤泥中長官聞言但愁嘆官符火速催查勘縣胥歡喜  
里胥愁供給來朝竟誰辦膈膈膊膊雞亂鳴後村已踏  
前村行縣官此行亦良苦可惜全災報三五連日飛章  
申大府上請於

帝帝曰撫春風一吹瘡痍蘇高田薺麥青模糊矧聞下  
詔蠲征輸澤有菱藕塘菱菰亦知水旱無時無愼勿遣  
吏來催租

題車迪之表弟彈琴長嘯圖

新篁森森如玉束有美揚芩好奇服自寫琅玕掃碧雲  
墨花鮮奪山眉綠綠過盧鴻舊草堂石牀苔老素琴張

思將法曲驚聾聽直譜中聲入大荒荒月色生叢薄  
流水涓涓滿幽壑曲罷猶餘尾段高聲希但見天花落  
落拓誰知萬古心龍歸滄海鶴歸林美人一去碧梧老  
帝子不來湘水深深深欲下常儀拜嘯聲飛落青天外  
塵世從教一顧難焦桐祇合金賈賣卻瑤琴更賣癡  
七條絃絕水仙知憑將翠鳳千年食捶作冰蠶五色絲  
絲風吹處衣衫動青霄凍合天無縫山鬼微吟窈窕詩  
江妃驚起相思夢夢醒仍含絕代愁琴聲嗚咽笑聲秋  
期君砍作如椽瓦月殿新修五鳳樓

介生招同謙夫汎舟秦淮大雨如注維舟柳陰稍

定雨霽月出興盡而歸賦詩紀之

侵晨屋角鳴勃鳩蔣山如墨凝雲愁陰陰垂柳湛深綠  
有客正買秦淮舟欲雨不雨天意秋大風激水聲颼颼  
芒衫捲作亂胡蝶蓬掀槳蕩不可收舟師擁楫客震恐  
如鳥擇樹紛欲投大船銜尾蹈趑趄小船窘束如拘囚  
須臾猛雨濺飛沫蠚眼亂點波心漚雷聲殷殷水轟聒  
萬斛倒瀉銀河流相看寒噤等蝸縮恨不五月披羊裘  
倚欄美人笑吃吃招客避雨登河樓迴看翠裏已霑溼  
煙光漠漠生簾鉤風吹雨來旋吹去纖翳詎肯青天留  
曛黃一色渚煙暝彎彎月上東關頭玉盤洗出應更潔

奈何啟鏡微含羞迴舟擊汰歌管發吳娃楚豔騰清謳  
鐙光照爛水波黑欲與星點爭沈浮與殊事極轉蕭瑟  
深杯且暢今宵遊陰晴頃刻尙難定况乃身世多煩憂  
夜深蝙蝠掠船過遠和殘滴鳴啾啾

### 觀賑行

皇帝御極之八載淮海大水民流移撫臣飛章請賑恤  
詔書報可

皇曰咨務令實惠沾百姓各敬乃事其無辭窮檐額手  
走相慶刺史以下咸奔馳粉朱計口徧邨堡魚鱗細字  
防隱欺先期給與大官鈔臘正二月斯賑時小民得鈔

轉愁歎遠隔數月焉能支東家積錢堆滿屋西家聚米  
高如坻不如將鈔易錢米減價猶得炊粥糜一朝設廠  
按圖籍縱有年貌難爲稽錢龍飛處眼空赤坐視富人  
腰橐垂中有黠者事要奪老拳奮起如禿椎喧聲雜還  
訴官長云此射利能居奇長官一言百喙息爾自願賣  
奚訴爲富人得錢爾亦活念爾窮餒姑薄答亦有至死  
不肯賣扶老挈幼來階墀自晨逮午僅百戶弱者簇擁  
強排擠晚鐘報罷俟明日郵亭露宿風酸淒敝衣露肘  
齒撞擊枯瘦如腊頭蒙供道長不足供口費歸來赤手  
徒傷悲亦知得錢不贍死

天恩浩蕩沾仁慈常平義倉自古設  
邇年轉濟離賈私  
急公貸粟當踴躍奈爾拮据誰能疵  
官厨減膳滋味薄  
朝夕供億斯取斯吏胥楮墨亦頗耗  
其有乾沒吾不知  
但願來春美麩麥

皇風所被蘇瘡痍矧聞海州境遼闊  
民多棄地荒不甦  
犁鋤已畢恃天雨猝遇旱潦功難施  
火耕水耨有遺法  
老農先嗇良可師渠開鄭白資堵洩  
灌田百萬成腴脂  
嗟哉水利誰復講太息成此觀賑詩

岳忠武送張紫巖北伐詩草書石刻題後

南人歸南北歸北朕北人也歸不得  
歸不得檜語塞中



原經畧亦有人二聖歸來恐相逼惟侯出身明大義  
背精忠思報國建康失守獨全軍已報紅旗傳廣德是  
時魏公初視師統制江淮資羽翼撻金伐鼓士氣騰一  
笑知公能辦賊酒酣濡筆動悲歌直蘸淋漓血成墨豈  
惟虵鳥見奇縱並遣風雲作鉤勒富平一敗惜才疏天  
意人謀固難測從此朝廷主議和秦城王氣高無極紫  
巖流落幸不死侯獨馳驅奮全力撼山容易撼軍難龍  
虎烏珠皆動色金牌十二詔班師壞汝長城淚沾臆黃  
龍痛飲復何時恨不同戈指君側已教樞密罷兵權旋  
見團扉恣羅織九哥歡喜兩宮愁片紙獄中誰所救祇

今遺墨重瓊瑰石貫精誠終不泐去年見侯手書表陳  
蘇家藏侯授江淮統制今年見侯石上刻如侯忠孝固  
謝恩表黃絹楷書墨迹無憾轉爲生才三太息

### 九龍觀瀑歌

九龍抱珠飛上天寶月不敢爭嬋娟雷公赫怒九關閉  
罰使遊戲青山巔當頭龍母舐龍子花胡倒植金須蓮  
化爲甘乳五百道直與山勢同蜿蜒一龍探爪勢欲下  
一龍弭耳趨向前一龍突起氣凌暴已落不落空中旋  
一龍掉尾似迴顧旁行側注身微偏一龍直瀉如弩弦  
一龍僵卧疑醉眠中流怪石忽撐拒狀若魍相揮老拳

元黃戰血灑空際散爲白雨凝青煙猛然一跌腰肋碎  
直下千丈流濺濺旁有兩龍奮身救赤舌睖睖噴怒涎  
陷爲窪坎濺飛雪雷霆萬古聲喧闐縣崖倒挂千足練  
明鎗翠羽相澄鮮上有偃蓋不死之貞松下有溥泓不  
測之深淵松毛蕩漾水波綠浮漚散激蜻珠圓我來山  
中月亭午溪風謾謾吹吟肩砭肌空翠起寒粟思欲作  
蜚飛翩翩呼僮汲泉撥松火百沸小試龍團煎會當騎  
龍上天去流霞一醉三千年

開門石

千年頑石睡不醒諸天鎖鑰勞妃丁巨靈一怒開門戶

如設帟幕張廣庭金光翠羽美無度翔鸞翥鳳來輜軒  
旁有古篆發光怪年深尙作蛟螭形龍威選事不解讀  
恐破天闕飛妖霆得無仙人作狡獪摩兜勒此新宮銘  
大書深刻青玉榜亦如千佛夸名經石不能言對以臆  
此山開闢天同青自來異境神鬼闕洞天福地多堅局  
上藥時有異人采松風祇許頻伽聽踏歌李白去千載  
無人藻繪雕山靈寒陵片石自可語今才疇復同溫邢  
惡詩疥壁半牛鬼隨風灰滅光如螢當門石漢笑齒嗟  
請迴俗駕車無停我無沒石飲羽技對此石丈心怦怦  
祇有慙猛具石性捫胸磊塊羅天星乞銘紅韉作騶導

求文烏帽開障屏狂歌甫畢闐然入天風觸指吹泠泠  
雲海謠

仙風一吹山骨鬆白雲莽莽紛朝東雲將特遺鍊雲手  
化作海水搖虛空山僧候雲等潮汐曳杖坐看青濛濛  
初如組練拖一疋漸覺氎絮堆萬重細組布獲滿天地  
裁翦大被非人功又如白天湧鉛瀕銀青凍合玻璃宮  
是雲是海不可辨但見驚波疊浪咫尺迷青紅眼前三  
十六峯竟何有想被海神鞭叱無餘蹤偶從天外露孤  
頂自肩以下滅沒隱見如神龍飛來仙鶴一千隻都似  
海人狎鷗踏浪動景何冲瀾忽然颶風吹起穀紉縐時

見陵娥牧犢倒騎白馬揚朱轡我聞九州之外大鯁壑  
五嶽盡入包羅中又聞桑田變海伏蛟蜃幻爲樓閣窗  
玲瓏詎有化成千垓疊歲海燦若星宿棲樊桐將毋山  
靈逞怪變冰花翦水煩青童我欲騎鯨上天去決雲一  
挂扶桑弓祇愁踏處白綿軟海水汨沒撞心胃煙消日  
出海不見彈指現出青夫容

仙女照鏡

玉女梳頭對明鏡碧滑琉璃曉妝靚窺人含睇背人愁  
一色芙蓉臉波映夢雨愁煙可奈何遠山青入黛眉多  
何當更踏蓮山頂聽唱風前宛轉歌

文筆峯

乾坤不可摹日月詎容畫山神作意夸秘妍百變千奇  
騁光怪無端擲作青天筆紫壑丹崖點髥漆風雨橫飛  
十界空星辰倒影孤光出署名彷彿尖頭公咄咄怪事  
疑書空青天向下筆向上鉤銀畫鐵何沈雄頂上花開  
更奇絕無情石定嘔心血恍從海上架珊瑚直與仙人  
作旌節近看乃是松槎枒三鍼五鬣揚天葩文成白鳳  
都奇字詩到青蓮始大家臨風欲上通天表纔識之無  
便煩惱劫後名山萬骨灰後人便是前人藁願天此後  
莫生才但作石頑任顛倒山神雨泣如點頭手持天花

爲掃愁寓形宇內本過客且復遊戲窮雕鏤奈何三錢  
雞毛筆妄思著述傳千秋笑呼白雲搗作紙萬斛倒瀉  
銀河流灑空墨雨飛五色興酣落筆風颼颼詩成卻願  
同懷客助爾增修五鳳樓

登蓮花峯放歌

黃山之山如游龍高峯一重雲一重玉京仙人特恐一  
直上天去手從空際擲下一朵青夫容夫容擲處千峯  
裏頑石修成妙明果雪竇寒窩玉井春霞標豔藝金枝  
火文殊道人初坐禪膝痕著石花爲穿當時豐干苦饒  
舌不然寒山拾得那復留因緣飛錫一聲萬山吼青蓮



吐出青師口咒蓋能收五百龍乘船便踏千年藕有石如萬

斛舟俗名采蓮船

一花一葉紛倒茄洞中蝙蝠嘯啞啞須臾海

水湛深綠但覺化身百千萬億瓣瓣皆蓮花忽然低頭

學參拜一枝擔向青天賣劉翁爛醉失神儀天女聞香

破鼻界旁有龜鶴尤雋奇或蹲或伏恣遊嬉巢來玉葉

都呈瑞銜出天花便療飢龜石鶴石高四五丈長約十丈形狀遍肖昔游曾

上華不注陡覺寒空起煙霧若教移置此山間蹠涖恐

失花牛步絕跡飛行我不能手搏香象演三乘終須一

笑從師利蹴踏蓮花第一層

### 天都峯

天都一峯高插天開闔直與天爭先仰看一氣通沆瀣  
俯視下界惟青煙千山萬山一齊矮或跪或俯趨拱前  
當年玉女與帝博箭壺一擲驍百千天公哆口笑流電  
撒花墮地成青蓮蓮花萬古不凋謝羣芳餌實來羣仙  
銀宮金闕啟秘奧紫微斗宿相鉤連百靈總總恣遊戲  
時有鸞鳳鳴其巔罡風一吹石骨聳猿猱欲上愁攀緣  
當門醉石都漫散手執局鑰張怒拳紅塵足跡那容到  
金烏瑟縮餘孤圓縱然飛身學仙鼠奮身躍向虛空懸  
轉愁醺醉不曉事叉手一跌深無邊否則冷雲刺喉吻  
黃頭跼跼成飛鳶安得化身金翅鳥排空馭氣飛翩翩

因之左把浮邱襲右拍洪崖肩手捫星斗漱天乳紫濛  
碧落供雕鐫雖無其事有其想且作調語夸狂顛山靈  
惟恐洩靈氣一霎雲氣鋪成綿

雲巢洞

癡雲澹蕩天不收飛入洞口風颼颼詎知局閉不得出  
化爲石乳空中流我欲高呼攫雲手盡拽白雲出洞口  
雲睡乍醒如嬈行空穴一聲蟄龍吼

書田雨中見過留連竟夕書此索和兼示予慚諸  
子

微雨忽霑灑蕭齋清似秋君來破岑寂相對惜漂流琴

劍依人苦薪蘇仰屋憂夜深還秉燭蟲語聽啾啾

辛苦蛾眉畫頻年立絳紗春愁濃竹葉生意禿梅花此  
事竟誰擅前途安有涯終須見騰達祇我鬢全華

山色環滁好吟鞭得得忙醉翁千載後亭榭未全荒關  
氣沈衰草江聲下夕陽畸人隨處有軋茁漫須狂

君歸自滁

陽爲余述所遇盲丐  
鬻書叟皆奇人也

蹭蹬憐吳淑飛揚感巨卿斯人皆篤正如爾更聰明烏  
兔信難駐雞蟲焉用爭名山他日付翦韭慰平生

### 梅陽訪麗田生墓

青霞奇氣鬱遺阡高咏如君骨定仙墨妙縱橫鴻戲海

燃松閣存稿

卷之下

琴聲幽怨鶴飛天生軌大隱無朝市死戀名山有墓田  
手種寒香三百本定知風雪抱花眠

白沙澗

細草疎花滿洞香山紅澗碧隱朝光松脂入地變蒼狗  
雲氣上天如白羊跡印清沙芒屨溼響回孤壁嘯聲涼  
陰陰石竇寒霏雨定有蛟龍起蟻藏

百步雲梯

一線單微走石梯更無蘿葛可攀躋青天直恐頭撐墜  
紅日都疑腳踣低俯視森然毛髮動仰窺孤絕井參迷  
登雲賴有同懷客長嘯丹崖望海西

坂磴院

石磴嵯峨絕嶂開二分投足尙驚猜山從鸛鶴巢中出  
人向龍蛇窟裏來神化丹青煩腕力鬼工雕鏤炫心裁  
鯁生自有包身膽一笑商邱踏壁回

閻王壁

由蓮花溝約百餘步上閻王壁舊有碣石庵今  
廢九如松翠葉攢聚如九柄如意今祇餘三如  
意矣壁上鐫有華藏西來朝山暮海等字

纔踏風輪又劫魔陰崖孤壁起森羅天龍斜睨甘人鮓  
山鬼含愁帶女蘿飛錫欲憑金地藏袒肩都是病維摩

遊蹤到此驚魂絕  
包老眞應喚奈何

惆悵詞

一曲清歌換紫雲  
妝臺詩卷尙香薰  
無端銷注兜央牒  
繡被春寒悵鄂君

不關療妒怨鷓鴣  
不用嚴妝賦洛神  
自是僊家清苦甚  
黃金難鑄董雙成

駱馬楊枝奈老何  
秋風秋雨病消磨  
憐卿莫作紅心草  
世世生生眼淚多

出門流水卽天涯  
潘岳中年鬢已華  
從此河陽成陌路  
傷心何忍種桃花

小別眞如人隔世相逢苦憶月初三樓中玉笛分明在  
便作齊奴死亦甘

贏得吳儂薄倖名古來緣盡易傷情照人心事三更後  
一盞殘燈分外明

接引松

插腳紅塵四十年白雲招我上青天金幢絳節如相引  
知有洪崖笑拍肩

迎送松

傾蓋相逢若有情留君不住贈君行因風寄與蒼髯叟  
除卻才人莫送迎



然松閣存稿卷之下終

秋碧先生釣之鄉先生也善古駢文詩歌釣束髮受書  
時卽耳先生名冀得一見爲幸旣而讀先生贈嶽雲羽  
士詩手摩心揣如或一見天不假緣而先生已死則此  
欲見先生之心又烏能執一詩而遽慰哉今年館宿遷  
王君甘岩家出惜庵先生所輯友聲集屬校列燃松閣  
古近體詩凡百首於是展卷一讀已而再三讀如咏懷  
踏災觀賑及游覽旅行諸作固不必執某代某人以狀  
之而風度清遠胸懷宕逸言論沉著乃眞如見先生者  
獨異釣於先生非有勢位以闊絕之又非有數千里山  
川以間隔之乃一見不得且僅僅抱遺集以謂如見其

人此可慨已先生駢體文爲某所執後之君子復有搜  
採如惜庵先生者是又鈞所希冀一讀之也咸豐八年  
五月三日鷺洲江鴻鈞漱芳謹識

秋碧先生籍江甯少聰慧書過眼背誦不遺一字雲夢  
吞楚奴僕命騷作爲文章千言立就嘗應京兆試都人  
士交相引重摘句陶然亭邊呼酒黃金臺上勝槩豪情  
一時無兩下第南歸慈雨吏部寓書先子曰爲江東羅  
隱謂不得貢之玉堂頗揚顯鑠鼓吹休明爲可惜也嗣  
此教授里中披襟露肘而歌聲猶出金石亦文人之侔  
僚無聊者矣所居釣魚巷自署門曰思將玳瑁爲逸少  
裝書願把珊瑚與徐陵架筆其抱負爲何等也尤工駢  
體稿藏門人鮑小山家甘岩王褰之謹識